

AMANAH DALAM TUGASAN

Warga UniMAP yang dirahmati Allah..

Islam sangat menitik beratkan perkara yang berkaitan dengan amanah dan menunaikan amanah adalah satu kewajipan kepada mereka yang diberi amanah, Allah Subhanahuwataala telah berfirman di dalam surah An-Nisa ayat 58 yang bermaksud:

“Sesungguhnya Allah menyuruh kamu supaya menyerahkan segala amanah kepada ahlinya, dan apabila kamu menjalankan hukum diantara manusia, supaya kamu menghukumnya dengan adil, sesungguhnya Allah memberi pengajaran yang sebaiknya kepadamu, sesungguhnya Allah sentiasa mendengar lagi maha melihat”

Anugerah amanah bukan sekadar suatu penghormatan dan penghargaan keatas kebijaksanaan dan kemampuan manusia berbanding dengan makhluk Allah yang lain, tetapi ia merupakan satu tanggungjawab yang mesti dilaksanakan dengan sebaik mungkin. Demi memastikan amanah yang diberikan dapat dilaksanakan dengan baik, kita haruslah bersikap jujur terhadap amanah ini dan melakukan dengan bersungguh-sungguh untuk tujuan mencapai matlamat kerja kita.

Warga UniMAP yang dikasihi..

Memelihara amanah dalam tugas adalah satu tanggungjawab yang mesti ditunaikan dengan sabaik mungkin dan jangan sesekali kita menyalahgunakannya. Sebagai seorang penjawat awam, kita menggalas amanah untuk melaksanakan tugas dengan penuh minat, tekun, gigih dan kesungguhan yang tinggi. Ini semua akan menjadi penanda aras kepada hasil kerja kita kelak.

Bertepatan dengan hadis daripada Nabi Muhammad SAW yang bermaksud:

“Sesungguhnya Allah menyukai apabila salah seorang daripada kamu melakukan sesuatu pekerjaan, ia melakukannya dengan tekun, sempurna lagi teliti” (Hadis sahih riwayat Imam Al-Baihaqi).

Warga UniMAP yang budiman..

Bagi mewujudkan suasana harmoni di pejabat, nilai-nilai mulia seperti hubungan kerjasama, bantu-membantu, bersangka baik, nasihat dan

menasihati seharusnya perlu ada diwujudkan. Sebaliknya nilai-nilai buruk seperti iri hati, hasut-menghasut, berprasangka buruk, ponteng kerja seharusnya dijauhi serta dihapuskan. Selain itu, antara amanah terpenting ialah para pekerja perlu melindungi dan menjaga rahsia dalam mempertahankan nama baik jabatan dan universiti daripada tercemar.

Semoga kita semua tergolong dalam golongan yang menjaga amanah yang telah dipertanggungjawabkan kepada kita di muka bumi Allah ini. Kerjasama dan perhatian semua dalam hal ini didahului dengan ucapan ribuan terima kasih.

~“Hai orang-orang yang beriman, janganlah kamu mengkhianati Allah dan Rasul (Muhammad) dan (juga) janganlah kamu mengkhianati amanat-amanat yang diberikan kepadamu, sedang kamu mengetahui.”~

(QS: Al-Anfaal: 27)